

Siunnersuisoqarfimmik inunnik akiitsoqartunik siunnersuisinnaasumik ikiuisinnaasumillu pilersitsinissamut periarfissat pillugit nalunaarusiornissaq pillugu Naalakkersuisut peqquneqarnissaannik Inatsisartut aalajangiiffisassaattut siunnersuut. Siunertaasussaq tassaavoq akiitsut annikillisarniarlugit immikkut ilisimasallit ikiortigalugit akiitsoqartunik akeqanngitsumik siunnersuisarnissaq. Nalunaarummi taamatut siunnersuisoqarfimmi suliasat suuneri aammalu immikkut ilisimasallit tassunga iluaqutigineqarsinnaanersut nassuiarneqassapput, kiisalu taamatut siunnersuisoqarfiliornep ingerlanneqarnera Landskarsimut qanoq ukiumut akeqarumaarnersoq. Nalunaarusiaq 2016-imi ukiakkut ataatsimiinnissaq sioqqullugu naammassereerneqarsimassaaq.

(Inatsisartunut ilaasortaq, Naaja Nathanielsen, Inuit Ataqtigiit)

Akissuteqaat

(Aningaasaqarnermut, Aatsitassanut Nunanullu Allanut Naalakkersuisoq)

Aappassaaneerneqarnera

Aningaasaqarnermut Akileraartitsisarnermullu Ataatsimiititaliap isumaliuutersuutaanut Naalakkersuisut qujapput. Ataatsimiititaliaq isumaqatigiissoq allannguutissatut siunnersuummik saqqummiussivoq. Ataatsimiititaliap allannguutissatut siunnersuutaata, aallaqqaataani siunnersuutip anguniagaa annertusivaa, taamaasilluni nassuiaatip maannakkut aamma akiitsut pinaveersaartinniarlugit suliniummik pilersitsinissamut periarfissat, assersuutigalugu privatimik aningaasaqarnerup aqunnissaanut ilinniartinneqarnissamut neqeroorutitigut, misissussammagit.

Ataatsimiititaliap isumaa, Naalakkersuisut tusaatissatut tiguaat, peqataasullu attuumassuteqartut suleqatigalugit nassuiaat kissaatigineqartoq suliarissallugu. Aammalu nassuiaammi Naalakkersuisut nalilissavaat, siunnersuisoqarfik aalajangiinissami siunnersuutigineqartoq, sumut inissinneqassanersoq, pissutigalugu siunnersuisoqarfik taamaattoq Aningaasaqarnermut Naalakkersuisoqarfiup suliasaqarfiata ataanut tulluutinngimmat.